



BIBLIOTEKA

Zakl. Nar. im. Ossolińskich

XVII

537





6

PANEGYRICVS

AD ILLVSTRISS^m ET R^oDISS^m DOMINVM,
D. BERNARDVM MACIEIOWSKI,
S.R.E. CARDINALEM, EPISCOPVM CRA-
couiensem, Ducem Seuerien: &c.
Mœcenatem amplissimum.

ANDREÆ SCHONEI,
S. Theologiae In Academia Craccuiensi
Professoris.



Conuentus Praesidi Summæ Reip^ub^licæ ad S. Anthonem.

CRACOVIÆ

In Officina Lazari. Anno Domini,

1604.

15.131



XVII - 537 - III

Purpureum tribuit tibi Summus Præsul honorem,
Fecit & excelsis Regibus esse parem.
Non tamen ^{hic}sublimis apex, magis te ornat, ut ipsum
Tu contra illustres dotibus eximiis.
Exuperat titulos, pietas, prudentia, virtus,
Digna nec in terris præmia repperient.

A. S.

PANEGYRICVS

ANDREAE SCHONEI.

ILLVSTRISS° AC RYDISS°
D. BERNARDO MACIEIOWSKI,
S. R. E. CARDINALI, EPI. CRAC. D. D.



N summa omnium lætitia, interq; tot
gratulantium faustas atq; iucundas vo-
ces, & ego, Cardinalis Amplissime, ex
mediis Academiae spatiis accurro; vt
amplissimum hunc, & primo proximi-
um honorem, coram voce, vultu,
oculis tibi gratuler, gloriosæq; purpuræ tuæ, vel
imam laciniam attingere & deosculari mihi liceat.
Si enim & ij, qui in extremis Italiae atq; Hispaniae
oris vitam agunt, & ad quos sola nominis tui fama
peruenit, optatissimo hoc nuncio accepto, effusis
certatim studiis, dignitati tuæ applauserunt, grauis-
simumq; Pontificis maximi iudicium, maxima ani-
morū consensione atq; alacritate cōprobarunt: quæ
mea mens, qui sensus, qui iucundus animi motus
esse debuit, cui præstantissimas tuas virtutes propi-
ùs intueri, exploratiùs cognoscere, & impensius ve-
nerari cōcessum fuit. Et cum beneficiorū, quæ me-
rentibus tribuuntur, gaudium, non magis ad ipsos,

quàm ad omnes bonos, verosq; rerum æstimatores perueniat, tum in eos potissimum redundet, qui humanitatis & beneuolentiæ officiis sunt obligati; quî ego aut gestientis animi lætitiã cohibere potui, aut exultantem pectoris affectum palàm ostendere non debui. Nam tu, vt vidisti me, amasti, ac continenter tot annos eximia humanitatẽ complexum, nuper etiam Gymnicorum ludorum præfectũ, quem nostri Vicecancellarium dicunt, tuo loco & nomine, in Lycæo Cracouiensi me constituendum duxisti. Quod arduum atq; grauissimum munus, & si aliis mei ordinis hominibus, qui ingenio, auctoritate, naturæ fortunæq; bonis me antecellunt; reatius fortè committi potuisset, mihi nihilominus abstinenti, & omnis ambitionis incurioso delatum esse, non potuit non accidere gratissimum, eaq; re singularis tuus in me amor, omni ex parte luculentissimè sese ostendit. Sed facessant priuata voluntatum studia, valeant mutua inter patronum & clientem officia, nec domestica voluptas aliquid de cõmunis lætitiæ suauitate decerpit, proinde mei quasi oblitus, in pulcherrimarum rerum, quæ te summis quibusq; honoribus iam olim dignissimũ reddiderunt, parca & verecunda commemoratione, omnẽ orationem consumam. Iuuat ergò per laudum tuarum spatia atq; vestigia, tanquam per viridicata præfron-

ta, frondosa nemora, vernantesq; hortos, læto passu incedere; ac summa omnis gloriæ atq; dignitatis capita perstringendo, ad decus, ad honestatem, tuarumq; virtutum imitationem animos accendere & excitare. Sed quemadmodum, qui pura nocte cælum magnitudine immensum, ordinata varietate constantissimum, ornatum atq; siderum luminibus pulcherrimum contemplantur, dum hanc stellam nitentem admirantur, aliam mox nitidiorem suscipiunt; & in hanc dum aciem oculorum defigunt, aliæ atq; alię lucidiores hinc inde, oculis eorū oboriuntur: ita dum pulcherrima tua animi, naturæ, aliæq; decora atq; ornamenta intueor, suspensio animo, ancipitiq; iudicio, hæc illis, illa his excellere videntur, vniuscq; claritas alterius splendore obruitur & obfuscat. Illustris est generis tui amplitudo atque dignitas: at longè illustrior exacta prudentia, maturo iudicio, maximoq; rerum usu atq; tractatione comitata. sed cum his certant vicissim, singularis animi moderatio, naturæ facilitas, munificentia, quæ omnia a Religione, pietate, vitæ integritate, morumq; grauitate vincuntur, exornantur, perficiuntur. Rarus est, qui omnium virtutum choro comitatus est, cuius egregiæ animi dotes non aliquo vitiorum confinio læderentur. Enitescit aliquis in bello, sed in pace obsolescit, alium toga, sed non &

arma cohonestarunt; multos claros foris, domestica deturpauit infamia. Ita vbiq; mala sunt vicina bonis, in iisq; etiam, qui in optimis numerantur, multa artificio declinanda sunt, quæ offendant. Tu verò, macte ea laude, omnes dignitatis atq; gloriæ partes atq; numeros complexus es; ita omnibus, animi, naturæ, fortunæq; bonis abundè ornatus es; vt ad eorum cumulū vix aliqua possit fieri accessio: & quid iure merito reprehendi possit, ne inuidus quidem atq; curiosus centum oculis Argi peruideret. Nihilq; tibi ad laudem amplius, ad nominis immortalitatem illustrius, quàm te penitèns perspici, tuaq; quæ limine tenes, intraq; intimos recludis recessu, in publicum proferri, ab omnibusq; cognosci.

Atq; non multùm in vetustissimæ tuæ gentis nobilitate commemoranda mea exultabit oratio, non assentatoriè Vitelliorum & Macieiouiorum egregia facta consecretabor; cùm & hæc fidelissimis annalium monumentis sint prodita, & tu propriæ quàm alienæ famæ incumbere semper maluisti. Namq; alii ex maioribus tuis, laudis patriæq; amore incenssi, vitæ lucisq; prodigi, fortia bella gesserunt, ordines duxère, signis conflixère, pugnas restituere, hostium impetus retuderunt, copias profligarunt, acies perruperunt, à Ciuiumq; iugulis acinaces, mucrones, à pectoribus tela atq; sagittas, à capitibus serui-

seruitutem atq; ignominiam depulerunt : alii togæ
 artibus clari , authoritate & prudentia Reipublicæ
 dignitatem auxerunt , constantia & pietate Religi-
 onem Ecclesiæ q; libertatem defēderunt. Quis Ro-
 berto vitæ innocentia , morum grauitate , dicendi
 facultate præstantior fuit? qui tempore Miecislai ,
 primi apud Polonos Christianorum sacris initiati
 Principis , Archiepiscopum Gnesnensem egit , her-
 bescentemq; Fidei segetem , ac prima Religionis in-
 cunabula , mira sedulitate fouit , nutriuit , propaga-
 uit. Non commemoro alios duos è vestra oriundos
 stirpe , Archiepiscopos , quorum in principem illam
 Ecclesiam , liberalitatis atq; pietatis monumēta ex-
 tant plurima. Mitto Andream Episcopum Plocen-
 sem , Stanislauum Posnaniensem Antistitem ; quorum
 ille omni genere doctrinæ liberalis excultus , inq;
 Ecclesiæ iniuriis vindicādis inuictō animo fuit ; hic
 in prouidēdo sagax , in tractandis negociis industri-
 us , omnium Vladislai Jagellonis consiliorum par-
 ticeps atq; moderator , supremus Cancellarius au-
 diit. Quis Samuelem Macieiouium , Episcopum
 Cracouiensem , ingenio , authoritate , Regum gra-
 tia , studiis hominum , effusaq; liberalitate supera-
 uit? quis Nicolao Palatino Lublinensi , Stanislao
 Castellano Sandomiriensi , pietate in Deum , chari-
 tate in patriam , ergaq; omnes propensa voluntate ,

par

par & æqualis fuit. Hac inclyta stirpe prognatus, tot auos, atauosq; illustres longa serie numerans, nunquã sublimes titulos, fumosasq; imagines, inuidiosasq; opes iactantiùs ostētaſti: nō in iis omne decus præſidiumq; collocaſti; ſed iis quaſi quibuſdam calcaribus ad domesticarum virtutum imitationē te excitando, quod alii ex alienis ſibi arrogāt meritis, id tu ex propriis factis tibi concedi voluiſti, nihilq; pulcrum & iucundum arbitratus es, in quo comparando, non diu multumq; ſudaffes. Nobilitas germana ſtirpe virtutis nititur: ac tam diu manet ac floret, donec in ea ſuccus honeſtatis viguerit; quo aſcente, & ipſa marceſcit. Vt enim ager, quò feracior atq; pinguior eſt, eò horridior, atq; deterior eſt, ſi cultura non adhibeatur; ita quò nobilior parentum ſanguis, & quò magis generoſa ingenia, ſi non diſciplina infrænentur, & optimarum artium ſtudiis excolantur, procliuiùs & maiori impetu in omne genus ſclerum & flagitiorum ruunt atq; prolabuntur. Quamobrem, vt primùm lubricam & incertã adoleſcentiæ viam ingreſſus es, durum pariter, ac rigidum virtutis iter triuiſti, in patientia animi & corporis te exercuiſti, eaq; literarum præſidia tibi comparaſti, quibus & conſilio te regere, & ſtatum mentis tueri, omnemq; cupiditatis immoderationem coercere poſſes. Et cùm acri & acuto ingenio

eſſes

esses præditus, quod se sine doctrina etiam tueri
 posset; eam tamen in cognitione veritatis, discipli-
 narumq; perceptione diligentiam adhibuisti, quæ
 etiam tardissimam naturã excitare posset; ita omnia
 celeriter arripuisti, mente comprehendisti, memo-
 ria sepsisti, ac si cuncta reminiscencia quadam reco-
 nosceres, nihilq; haberes discendum tempore do-
 cendi. Et quia hominem non modò ad intelligen-
 dum, sed & ad agendum natum scires, tibiq; ali-
 quando in maiorum tuorum vestigiis standum, inq;
 Reipublicæ luce versandum præsentires; ita orbem
 omnium artium fœliciter confecisti; vt ex singulis
 tantum sumeres, quantum ad egregiæ virtutis v-
 sum, publicamq; vtilitatẽ satis superq; esset. Quid
 enim est aliud scientiã sciẽditatũ quærere, quàm *causa*
 nummis ad numerandum duntaxat abundare? &
 quid aliud est, omnes disciplinarum minutias atq;
 subtilitates curiosè confectari, quàm cancris vesci,
 in quorum crustis vellicandis, paruo operæpretio,
 plurimùm occupari solemus? Tu scientiarum mo-
 dum vtilitate terminasti, easq; tum ad aciem mentis
 illustrandam, tum ad vitæ consuetudinem accom-
 modasti & retulisti; vt non modò de rebus rectè &
 prudenter iudicares, sed & quæ benè statuisses, feli-
 citer exequerere. Et quia sapientiæ atq; virtutis dis-
 fidium & diuortium nullo modo ferendum est,
 B
 nullaq;


PANEGYRICVS.

5
 nullaq; funestior rebus communibus pestis adferri
 potest, quàm scelere & malitia armata literatura; tu,
 à teneris, vt aiunt, vnguiculis, vtrumq; pulcherrimo
 societatis vinculo coniunxisti, atq; in vtroq; ex-
 cellere, gloriosum duxisti. Nihil leue & ludicrum
 ob grauitatem, nihil molle & flagitiosum ob indu-
 striam, nihil tumidum & inflatum ob modestiam ex-
 petiisti: nihil timidè & diffidenter, nihil præposte-
 rè & negligenter, nihil temerè & impotenter egisti;
 sed in omnibus dictis & factis, modum & ordinem,
 decorum atq; constantiam tenuisti. Omnia blandi-
 menta & lenocinia naturæ auersatus es, omnem lu-
 xuriam & intemperantiam fugisti, omnem impuri-
 tatem atq; turpitudinem exhorruisti; teq; à sensuum
 consuetudine auocans, & à corpore ad animum re-
 uocans, summam voluptatem in immanium volu-
 ptatum fuga, atq; modestiæ & pudoris concinnita-
 te constituisti. Quid loquar de pietate, quæ vt est
 omnium virtutum fons & origo, canon & regula, à
 qua illa vitam & spiritum accipiunt, ita eam assi-
 dua cura, diligentia, studio coluisti, in ea te exer-
 cuisti, vt ab eius præscripto ne latum quidem vn-
 guem discederes. Summa religione cæleste numen
 venerabare, ardentissima fide eius præsidium implo-
 rabas, tota mente mentem & voluntatem eius con-
 sulebas, incredibiliq; voluptate, in suauissimo illius
 collo-

colloquio atq; familiaritate conquiescebas. Nemo sapiens, qui Deum non colit: sapientia vera, tum in Dei pura & liquida cognitione, tum in sanctissimo eius cultu continetur. Vt enim Deus est architectus & molitor omnium rerum; ita lumen, ratio, veritas, qua omnia cognoscuntur. ille est, qui densas errorum tenebras dissipat, cælestibus instruit disciplinis, mentemq; veræ sapientiæ radiis illustrat. Quæ pietas tecum ab adolescentia creuit, adoleuit, maturuit, teq; ubiq; comitata est, tuarumq; omniû actionû dux, magistra, & moderatrix fuit, siue in aula Regum ageres, siue castra militiamq; sequerere, siue aliud negocium publicum, priuatum ageres. Quæ virtute tanquam firmissimo Clypeo munitus, nunquam ad hostis vultum expalluisti, nunquam trepidasti, animo concidisti nunquam, pedem retulisti nunquam, sed victricia Poloniæ signa inconcussa manu tenuisti, & in hostem fortiter intulisti. Et quoniam vera pietas nunquã cessat, nunquam ocia-
tur, sed nunc contemplationis quasi quibusdam alis in altum subuecta, Deum quoad fas est, intuetur, adorat, prædicat: nunc charitatis officia exercet, solatur afflictos, fert opem miseris, docet ignaros, dirigit errâtes, corrigit delinquentes: nunc contra hostes Ecclesiæ certamen init, dimicationem suscipit, ac doctrinam cælitus traditam animosè tuetur atq;

propagat : omnia hæc munera tu diligentissimè executus es : neq; solùm mentis agitatione, orisq; præconio, sed & eximiis factis & rebus, animi tui erga Deum, sanctissimamq; religionem, studium, & deuotionem declarasti. Nam patrimonium à maioribus tibi relictum, opima prædia & oppida, optimo consilio, diuina vi excitatus, patribus Societatis Iesu, perpetuo iure addixisti, inscripsisti, donasti; vt in illo Rursiæ & Lithuanix confinio, contra Hæreticorum & Schismaticorum castra atq; acies, quasi quædam cohortes prætorianæ excubarēt. Quorum conatus, mirè fœcunda gratia Deus adiuuat, auget, fortunat, eorumq; opera multos à vitiis ad honestatem, à tenebris ad lucem, ab errore in viã reductos videmus & gaudemus. Quicquid ergò illi de Ecclesia Dei, de genere mortalium, bene merentur; id tibi magna ex parte acceptum ferunt, teq; in partem ac communionem meritorum libentissimè accipiunt. Macti viri Apostolici, cœptum opus gnauiter vrgete, nec inuidiæ, nec calumniis, neq; laboribus atq; periculis cedite; sed contra audentiores itote: ille, qui vos sub tropheis filii sui vnigeniti cōgregauit, vobis semper aderit, cælesti virtute corroborabit, ac in summa rerum confusione atq; perturbatione tuebitur. Rarum est sua dimittere, cùm multi vt aliena consequantur, quid non faciāt? durum est.

rum est auitis sese possessionibus exuere, cum personæ dignitas etiam plura requirat; sed longè grauius est & admirabilius, se relinquere, ac quodammodo seipsum seipso exuere. Nam ætate integra, quæ valida viribus, exercita laboribus, matura rebus gerendis, nullum non negocium conficere, nullum non munus sustinere posset, cum gratia Regum floreret, cum Regni Præfecturas teneres, cum tot emerita tam militiæ, quàm palatii stipendia haberes, diuina virtute confirmatus, pro fluxis & caducis, æterna atq; cælestia expetiisti, ac lubens volensq; ad vexillum Christi euolasti. Et vt maiora haberes piè & sanctè viuendi incitamenta, Romam, quæ te & viuis & mutis exemplis ad sanctimoniam accendere posset, longinquo & aspero itinere profectus es. Quò cum venisses, non Romam illam veterem, omnium superstitionum sentinam, atq; impiorum numerum Regiam, in suo cadauere atq; sepulchro iacentem quæsiuisti: non cælo certantia opera, amphiteatra, thermas, palatia, pyramidas, arcus triumphales, colossos, statuas, aërio pendentes fornice riuos, aliasq; infanas substructiones admiratus; sed in nouam Romam, arcem Religionis nostræ, sacrarium omnis sanctitatis, totq; Martyrum sanguine ac gloriosis trophæis illustratam oculos, omnemq; animum cōuertisti. Sæpè septem illas religiosissimas



basilias, sine vehiculo, summis caloribus frequen-
 tasti: sæpè ad limina Apostolorum procubuisti, pos-
 tes deosculatus: sæpè præsepi domini affusus, bis
 genitum Regem adorasti: toties Lauacrum Con-
 stantini adijsti, ac sacrosanctam illam, dæmonumq;
 expultricem, imaginem Redemptoris nostri venera-
 tus es: toties profundas illas, ac religionis pio hor-
 rore plenas criptas atq; catacumbas, tot Pontificum
 atq; Martyrum quondam latibula, ac veneranda se-
 pulcra, subijsti, atq; lachrymarum largo imbri per-
 fundisti: præterea tota vrbe monumēta atq; reliqui-
 as sanctorum perquirendo, sacris cineribus, fauillis,
 ossibus, osculum figebas, oculisq; oriq; admoue-
 bas: tu deniq; modestiam & grauitatem Romanam,
 seueram Cænobiorū disciplinam, amplissimas Xe-
 nodochiorum opes, atq; incredibilia omnis charita-
 tis officia admirabare. Tandem satis probatus, atq;
 spectatus, per omnes Ecclesiastici ministerij gradus,
 ritè & sanctè progressus, venerabili sacerdotio ibi-
 dem initiatus atq; inauguratus es. Mirabile & iu-
 cundum erat videre, Macieiouium, qui in cohorte
 Regis primicerius fuerat, abiecto militari bal-
 theo, militiae Christi nomina dedisse, in ordine sa-
 cerdotum ministrare, vnum ex Canonicis Cracoui-
 ensibus esse, religiosè rem diuinam facere, precati-
 onum pensum Deo fideliter reddere, cum Socolo-
 uio,

uio, Rescio, Scarga, Dobrociescio, & aliis piis viris assiduè conuersari, in æde Mariæ Magdalenæ sacris exhortationibus & declamationibus interesse, obire monasteria, lustrare hospitalia, deniq; vultu, gestu, incessu, sanctimoniam præferre. Sed non diu hic gradus & locus tantum ingenium continere valuit, nequiuit his angustiis tam excelsa cõarctari virtus: maiorem campum, in quo excurreret, amplius theatrum, in quo spectaretur, requirebat. Itaq; simulatq; post procellas atq; tempestates Interregni periculosissimi, Sigismundus Rex, superatis Oceani fluctibus in Poloniam appulit, atq; ab amplissimo viro Stanislao Karnouio Archiepiscopo Gnesensi sacro oleo delibutus, Regioq; diademate insignitus, habenas Sarmatiæ moderari cœpit, incredibili tuarũ virtutum amore & admiratione captus, te primo quoq; tempore, in principe aliquo dignitatis gradu collocare statuit. Et cùm interea Episcopus Luceoriensis è viuis excesserat, te ei successorem subitò & magna animi lætitia designauit: eãq; Serenissimi Regis voluntatem Sixtus V. altissimæ mentis Pontifex, ratam habuit, ac libentissimè comprobauit. Et quoniam hic apud nos, laudatissimo & sanctissimo maiorum instituto, Episcopi, non modò Religionis, sacrorum atq; ceræmoniarum præfides sunt; sed & publici consilij moderatores, primumq;

mumq; in Senatu locum teneant; tu subito omnes
 veri & perfecti Episcopi, atq; Senatoris partes, cura
 & cogitatione complexus, vna manu Ecclesiam, al-
 tera Rempublicam tractare cepisti; ac sedulo pro-
 uidere, ne quid Religio & communis vtilitas de-
 trimenti patiatur; sed omnia salua, tuta, atq; sarta-
 tecta conseruetur. Cumq; præclaris tuis actionibus
 eam de te animis omnium opinionem inseruisses,
 nihil esse tam arduum & difficile, quod tibi non sit
 leue & expeditum, nullamq; rem tam grauem atq;
 dubiam, quam non ingenio sustinere consilio tueri,
 virtute conficere posses; subinde alia super alia ne-
 gocia tibi commissa, ac Regis & Reipublicæ nomi-
 ne sumtuosas atq; laboriosas legationes suscipere
 coactus es. Ac primùm ad altissimi sanguinis Prin-
 cipem consolandi gratia missus es, cuius & si æquum
 & infractum in omni euentu & fortuna animū, nulla
 vis aut calamitas labefactare ac percellere posset; tua
 tamen oratione mirificè recreatus, omnia modera-
 tiùs ferre cœpit. Deinde more maiorum, atq; adeò
 omnium gentium, quæ Religione Christiana cen-
 sentur, aliquis è proceribus Regni, consilio prou-
 idens, virtute integer, authoritate venerabilis, religi-
 one sanctus, ad Sedem Apostolicam, cæli vicariam,
 mittendus fuerat, qui nomine noui Regis, qui cum
 lacte materno, in gremio matris Iagelloniæ Religio-
 nem

nem Catholicam hauserat, eamq; inter medias procellas hæresum, illibatam atq; integram, semper custodisset, obedientiam præstaret atq; profiteretur; tu tanquam solus fores, ad eam rem cum dignitate conficiendâ maximè aptus & idoneus, omnibus visus es. Quam grauissimam legationem ita gessisti, vt festinam celeritatem in itinere conficiendo adhibueris, splendido comitatu, ingentiq; hominum exterorum tibi obviam effusa multitudine urbem ingressus sis, summi & clarissimi quiq; viri te assiduè conuenerint, domum deduxerint, reduxerint, summa fide & prudentia mandata Regis exposueris; incredibile dicendi copia atq; grauitate augustissimum illum Senatum tenueris, deniq; spectata probitate & integritate, Sixti quinti: at quis, & quantus Pontifex? & in te propensum animum conuertes, & egregiam animi voluntatem erga Regem vniuersamq; Poloniam excitaris, atq; inflammaris. Sed breui post tempore, Sixto quinto vita functo, iterû gratulationis atq; obedientiæ legatione ad Gregorium decimum quartum, functus es, eandemq; prudentiæ, industriæ atq; integritatis laudem retulisti, ingensq; tui desiderium discedes reliquisti: & si, quæ tua est animi moderatio, in priuatam laudem atq; gloriâ deriuatû velles nihil; sed omnia ad honorem & splendorem charissimæ patriæ tuæ referres atq;

conuerteres. Te reducem Respublica complexa,
 pro re bene gesta immortales gratias egit, certisq;
 præiudiciis ac præfagijs tibi summa quæq; augura-
 ta, atq; sponndit. Tu verò vix puluerem ex itine-
 re collectum excusseras, ac spiritum recollegeras,
 subito magna festinatione atq; celeritate, ad tuam
 Episcopam Luceorensem contendisti: atq; in cu-
 stodia & statione constitutus, boni pastoris perfe-
 ctam formam atq; imaginem vita & moribus, studijs
 & officijs expressisti, repræsentasti. Tu oves cælesti
 precio redemptas cōtra siluestres feras, quæ ad cau-
 las gregis sacri assidue fremunt, aditumq; rimantur
 vndiq;, sana doctrina obarmasti: tu eas in pratis sa-
 luberrimis, & omnium virtutum floribus vernanti-
 bus pauisti, ac ne mala vicini pecoris contagia læ-
 dant, prouidisti: tu palantes requirebas, dilapsas
 colligebas, lapsas erigebas, ægras fouebas, debiles
 fulciebas, torpentes excitabas, exanimatas recrea-
 bas. Tu summa grauitate atq; lætitia Episcopos to-
 ties inaugurabas, Presbyteros consecrabas, nouos
 Tyrones baltheo militiæ sacre astringebas, & in vi-
 neam Domini vndiq; nouos operarios cōgregabas.
 Tu templa collapsa in integrum restituiisti, neglecta
 & squalore obsita in nitorem dedisti: nuda & egena
 & omnis generis supellectilli, & nouis censibus &
 pensionibus, ornasti, auxisti, locupletasti. Quid au-
 tem ad

rem ad posteritatis memoriam prædicabilius, & ad gratiam Dei consequendam efficacius; quòd, cum tua Dicecesis plena esset schismaticis, qui se à corpore Ecclesiæ Romanæ absciderunt, ac nescio quos novos Petros in Græcia & Tracia nequicquã quærunt, ex vrbe Roma, viros eruditos, & linguæ Græcæ peritissimos acciueris, qui cum pertinaci illa gente ex æquo pedem conferant, paribus armis congrediantur, ad dulcissimumq; matris sinum atq; gremium reducant. Quòd quàm feliciter cesserit, vel illud argumento esse potest, quòd Antistites sacrorum Rursiæ, breui pòst tempore, diuinæ lucis radiis illustrati, pertæsi suæ rebellionis, Romam profecti sint, atq; abiurata omni contumacia, Romani Pontificis pedibus osculum fixerint; seq; eius potestati, authoritati permiserint, semperq; illius dicto audientes, fore venerabundi publicè & palam professi sint. Quos tu non modò, consilio, opera, sed & non exigua pecunia, equis, aliisq; rebus necessariis, iuisti, subleuasti; vt eò alacriùs & fidentiùs iter institutum ingrederentur. Sed cum tu Luceoriam tuã, atq; adeò vniuersam Volhiniam Religionis potestate tenes: eodẽ interim tẽpore, Georgius Raduilius, T. S. Sixti Cardinalis, Ecclesiam Cracouensem summo cum imperio, maximaq; cura & sollicitudine gubernabat: qui dùm pro munere & honore

suæ amplissimæ dignitatis, & vt anni Iubilæi vberri-
 mos sacrarû Expiationû fructus cõsequeretur, Ro-
 mam iniquo anni tẽpore proficiscitur, eoq; affecta
 peruenisset valetudine, dura vi morbi depascẽte ar-
 tus, intimisq; medullis vitalẽ calorẽ hauriente, ibi-
 dem è viuis excedit, & quasi fatali falce, tergemina
 illa, Cardinalis, Episcopi, atq; Principis imperii
 dignitas atq; corona præciditur. Erant tum multi,
 (vt est Polonia fœcunda bonorum & magnorum vi-
 rorum) sapientia prouidentes, autoritate gra-
 ues, & pietate præstantes, maximoq; rerum vsu pol-
 lentes viri; qui hanc dignitatem tacitis animis, ar-
 dentissimisq; votis optabant, & sitienter cupiebãt;
 sed rogare, ambire, prensare, nec eorum ferebat mo-
 destia, neq; Regis permittebat autoritas: tu tamẽ
 optimi & prudentissimi Regis, qui non magis e-
 xercendæ, quàm remunerandæ virtutis studio tene-
 tur, maturo & grauissimo iudicio, tot grauissimis
 viris antelatus es, ac Clementis octaui Summi Pon-
 tificis autoritate, ab Ecclesia Luceorisiensi ad Cra-
 couiensem translatus es. Magnum excellentis vir-
 tutis argumentum est, & probatæ conscientiæ fru-
 ctus, cùm fasces pro fascibus committuntur, & qui
 magna consecutus est, maiora tamen mereri iudica-
 tur, idq; à maximis. At, qui dolor, qui gemitus fu-
 it Luceorientiũ, cùm ab iis discederes? nemo fuit,
 qui à

qui à lachrymis temperaret , qui fingultus contineret, eiulatu lamentis atq; ploratu cõplebant omnia: Clerus patrem , nobilitas patronum , plebs altorem amiffisse fibi vifa est. Tibi verò viciffim etiam inuito per ora genafq; lachrymæ erumpebãt; nec animi dolorem celare, miftaq; fingultibus fufpiria difsimulare poteras; & fi integrum fuiffet, apud eos fortè reftitiffes : toto itinere de iis loquebare , eorum memoria non modò animo , fed & oculis obuertifatur; nec ingens defiderium priùs aliquo modo leniri potuit, donec Cracouiẽfiũ effufa in te certatim ftudia cerneres. Summa enim animorum alacritate, fplẽdifiimoq; comitatu & apparatu urbem inuectus es. Omnia tubis, tibiis, lituis, buccinis perftrepebant : Cytharis fidibus , fambucis, campanis perfonabãt; fragore & mugitu bambardarum & tormentorum contremifcebant omnia. Atria ædium, fuauiffimis odoribus fragrabant : limina arborum comis, foliisq; virẽtibus frõdefcebant: feneftræ pergulæ, moeniana, tapetibus Attalidis , & periftromatibus beluatis collucebant : tecta hominum multitudine referta , mole fua laborabant: omnes plateæ, vici, vrbisq; regiones oppletæ, cõcurfabatur vndiq; alacris hinc inde populus, par vbiq; gaudium. Flos procerum , fplendor equeftris ordinis , longè extra urbem tibi obuiam prodiit : facerdotum examina ,

sacro, plenoq; pietatis ornatu venerabilia, longo ordine te præcedebant: Doctores atq; Magistri, omnes togis atq; Epomidibus, tanquam veteres Quirites, ornati, cum innumerabili iuuentute sua te honorifica pompa in urbem deduxerunt; deniq; omnis generis, ætatis, conditionis ac fortunæ homines te faustis acclamationibus prosequiebantur. Te paruuli noscere, te iuuenes ostentare, te senes admirari, & libera inter se voce loqui: Hicciné Bernardus Macieiouius, quæ oris dignitas, quæ corporis forma Priami imperio digna, quàm decora proceritas, quàm inflexa ætatis maturitas, vt ex oculis, vultu diuinus quidam vigor emicat, vt in gestu motu, decor atq; gratia, Summa ergò hominum lætitia, in folio D. Stanislai gloriosi Martyris collocatus, num in actu, vt antiquo verbo vtar, striaſti: num dignitate ad ocium, animiq; remissionem, num opibus ad perfrueſdas voluptates abusus es? Nequaquam, ſed totus in laboribus, te ipſo maior effectus, ac tecum certans, illuſtriora prudentiæ, pietatis, curæq; paſtoralis documenta, atq; exempla edidiſti, & ea quæ ab ampliſſimo Radiuilo Cardinale egregiè cæpta fuerant, ſupremam illis manum impoſuiſti. Nã primo quoq; tempore, Eccleſiaſticos omnes ordines, ex ampliſſima tua Dioceſi, Cracouiã euocaſti; ac cum iis de rebus ad Religionem, & populi Chriſtiani

ftiani vtilitatē pertinētibus, vtiliter cōfultafti. Deīde magno sumtu tuo feminarium, ad eos qui facris ordinibus initiandi ſunt, præparādos, ac ſacrorum rituum, aliisq; piis doctrinis præcolendos excitafti. Pſyrtaneum quoq; ſacerdotibus, qui aut ætate laboribusq; confecti, aut vi morbi preſſi iacent, deſignāfti; vt & ipſi in ocio cum dignitate & rerum neceſſariarum copia reliquum vitæ tranſigant; & alios ſpes futuræ quietis, vitæq; honeſtæ, ſubeundis laboribus faciat promptiores. Moxq; Diœceſin circumuiſti, luſtrafti, in vitam & mores cleri inquiſuiſti, libertatē Eccleſiaſticam defendiſti, ac beneficiorū iura, redditus, muniaq; diligenter perſpexiſti. Et cūm de omnium Eccleſiarum commodis & ornāmētis cogitares; tum præcipuè principem tuam baſilicam, in qua tot Diuorū preciōſi theſauri, totq; ſuperba Regum Mauſolææ, vt ſacrorum ritus maiori honore peragerentur, ingenti vi pecuniæ donāfti, cenſibus ac redditibus annuis auxiſti, grandibus candelabris ex argēto conflatis, ingēti calice ex ſolido auro elaborato, ſtatua Diui Tutelaris Vēceſlai ex argento fuſa, eiusq; ſacroſanctis reſtitiſti, ex vicina Boemia & Sileſia magno ſtudio cōquiſitiſti, tecto inſuper æreo, aliisq; illuſtribus & ad ſplendorē domus Domini memorabilibus rebus illuſtraſti atq; exornāfti. Quod verò genus officii, erga Religioſas familias,

lias, Deo dicatas virgines prætermisisti? quod genus beneuolentiæ ministris Ecclesiæ nõ exhibuisti? Cui egeno opem non tulisti? quæ afflictũ nõ solatus es? cui pupillo, aduenæ, militi tua arca, tua domus clausa fuit? omnium dolori & calamitati illachrymabas: ab omnibus periculũ, ignominiã propulsabas: ubiq; locorum odia, dissidia, simultates restinguebas, ac morte tua libeter aliis vitam repræsentasses. Quod cum religiosissimo tempore, lubilæi innumerabili hominum multitudine frequetati, tum sæuissima illa pestilentia, quæ vniuersam Cracouiam vasta strage depopulabatur, egregiis argumentis enituit. Nam sacerdotes, peregrinos, vndiq; ex vltimis etiam Lithuaniae & Podoliae finibus ad piacularem celebritatem concurrentes, totos tres menses largè & liberaliter, aluisti, sustentasti, & cum ex loco pestilenti præsentemq; omnibus mortem intentante, ægrè ac vix precibus victus discessisses, quos præsens charitatis officiis solari non poteras, absens incredibili liberalitate, atq; beneficentia subleuabas, multosq; non modò a dira lue, sed & ab intolerabili fame seruasti. Quid loquar de tuo erga artes eruditas, earumq; Doctores & alumnos, singulari amore, atq; beneuolentia? Testes sunt viri scientissimi, & nulla in re rudes, quibus latus tuum circumsepisti, cum quibus curas & negocia tua partiris. Testes tot in-
 genui

genui adolescentes, quos liberali impensa, tum hinc apud nos, tum apud externos, optimis disciplinis in-
 buendos curas: testes alii, quos præmiis allicis, ho-
 noribus inuitas, fortunis locupletas. Tua authorita-
 te & opera effectum est, vt Serenissimus Princeps
 Vladislaus, germen Jagellonium, germen Austria-
 cum, imago paterni animi, quiq; maturitate iudicii
 atq; virtutis ætatis cursum longè superat, inq; am-
 plissimarum opum, ac tot Regnorum spem atq; suc-
 cessionem feliciter crescit, Lycei nostri, ab abauo
 & cognomine suo instituti, angustias subierit, humi-
 les exedras inuiferit, ac literatas laureas, quas septē
 Philosophis tua vice distribuebam, conspectu suo
 augustissimo quasi splendidissimo quodam sole co-
 lorârît & illustrârît. Eaq; solennitate peracta, cum
 Serenissimo Principe, non modò procères Regni,
 floremq; comitatus Regii, sed & primores Acade-
 miæ, splendido & dignitatis plenissimo cõuiuio ac-
 cepisti. Tu nuper (ordinem temporum variabo)
 re diuina ad vnam & aram Beati Cantii peracta, quò
 maior esses, eò minor esse cupiēs, inopinatò in Col-
 legium nostrum diuertisti, neq; mensæ nostræ tenui-
 tatem fastidians, frugale ac quotidianum nobiscum,
 tanquam vnus ex nobis, prandium sumere voluisti,
 ac deinceps in Bibliotheca nostra euoluenda magnā
 eius diei partem, iucundè transegisti, in qua & tuum

ex ære chorinthio Aristotelem, characteres Iapōnicos, cum eiusdem vltimæ gentis Philosophia, & alia tuæ in nos liberalitatis monumenta, modestè ac verecundè recognouisti. Incredibilem eod die animi moderationè ostendisti, fascesq; & infulas literulis nostris submisisti; cuius insignis facti gloriam nulla obruet vetustas, nulla memori æuo eximet obliuio. Atq; hæc aliæq; maximæ virtutes, cum tibi apud omnes ingentem gloriam peperissent, magnamq; tui admirationem commouissent, tum supremi religionis nostræ Moderatoris propèsum animum ad tuam dignitatem amplificandam mirificè incitârunt, atq; inflammârunt. Iamq; olim te in arce honoris collocasset, nisi summa cunctatione in eiusmodi rebus, perpetuè uti, animum induxisset suum, cum & Nepotes suos omnibus animi & naturæ opibus florentissimos, accepto pontificatu, toto ferè biennio pēdere animis, dubiaq; spe trahi passus sit, neq; priùs eos in purpuratorum Patrum numerum retulit, donec in amplissimo orbis teatro, in tanta rerum negociorūq; varietate & multitudine, ingenium, prudentiam, aliarumq; virtutum exempla ostenderent, atq; proferrent; ne tam cognationi quàm meritis summum honorem detulisse videretur. Cuius sanctissimi Pontificis acere in æstimandis cuiusq; meritis iudicium, feruens in remunerâdis virtutibus studium,

dium, sollicitos in Catholica Religione propaganda, hæreticisq; profligandis labores & conatus, auxiliarias deniq; copias, pecunias, aliaq; belli adiumenta, ad Turcarum violentiam refrænandam atq; excindendam, nulla ætas tacebit, nullæ non loquentur literæ. Hic ergò talis & tantus Pontifex, te nuper in arce montis Vaticani, ad gloriosum Clauigeri Petri tumulum, tuis meritis pensiculatè longoq; examine ponderatis, in Senatum Apostolicum, Princeps orbis terrarum, consilium adlegit, teq; Romanæ Ecclesiæ Cardinalem amplissimum renunciauit.

Plurimum debet Sarmatia Clementi octauo, multa ab eo ornamenta, dignitatis, & præsidia stabilitatis accepit, quam gratiam nullis officiis, nullis memoris animi monumentis referre atq; persoluere poterit. Ille dum Cardinalis esset, ab vrbe in has Septentrionis oras arbiter & sequester pacis missus, tranquillitatem Poloniæ reddidit, ac vicinarum Regum arma atq; animos pacauit: ille Romanus Pontifex diuino consilio creatus, S. Hiacynthum, socium atq; discipulum S. Dominici, Diuorum cælestium ordinibus adscripsit: S. Stanislai gloriosi Martyris memoriam toto orbe, quæ Sol oriens quæ occidens, colli & celebrari iussit, ac B. Casimiri Regii sanguinis, sanctimoniam diulgauit atq; publicauit: ille auspiciatissimas Sigismundi Regis, cum Serenissi-

ma Anna Auftriaca nuptias, per amplissimum legatum Georgium Cardinalem Radiuilum cohonestauit atq; confirmauit, eundemq; Illustrissimum Cardinalem post grauiter ægrotantem mortiq; vicinum benignè inuisit, ac tum pietatis & beneuolentiæ plenissimis verbis, tum amplissimis veniæ atq; relaxationis thesauris, ex infinito & immenso Ecclesiæ ærario depromptis, recreauit atq; solatus est: ille multos nostræ gentis homines ad honores extulit, opibus auxit, intraq; domestica limina, aut à cubiculo, aut à poculis, aut ab aliis officiis atq; ministeriis, amantissimè fouet atq; complectitur: illi Academiæ nostræ studia sunt cordi & curæ, eaq; per amplissimum Nuncium suum, Claudium Rangonum, Episcopum Regii, virum propter eximias suas virtutes, omni honorum fastigio maiorem, Serenissimo Regi nostro, prolixis & optimis verbis commendauit: ille deniq;, quod caput rei est, te hoc ostro atq; coccino velauit, atq; exornauit. At quæ & quanta dignitas, & quæ proxima Summæ potestati, Regum maiestati par, non nisi aut Principum atq; Dynastarum aureæ soboli, aut diuinis & admirandis ingeniis, aut heroicis atq; præstâtissimis virtutibus atq; meritis deferri solet. Vos Cardinales estis Principes mundi, Senatores terræ, Iudices orbis, signiferi populi, administri & adiutores Summi Pontificis:


Vos

Vos fidei præcipui defensores, Hæresum fortissimi extinctores, fidelissimi Sedis Apostolicæ vindices. In vestra tutela latet res humanæ, in vestro præsidio acquiescunt, vestro consilio reguntur, virtute muniuntur, autoritate conseruantur. Vostranquillitatem publicam cõstituitis, pacem inter Reges stabilitis, fluctus atq; tempestates Rerumpublicarum componitis. Vos estis seminariũ Pontificum, vosq; ius & potestatem habetis, è vestro Ordine atq; Collegio, cum eligendi, cuius munus potestate Deo proximũ est, dignitate inter homines summum, administratione, nullis regionum spatijs definitum, duramẽto atq; stabilitate nullis seculis interiturum, nullisq; hostium machinis infringendum & expugnandum. Quare gaude Illustrissime Princeps, excellenti bono tuo, frueri hac sublimi felicitate: & quoties hic purpuræ fulgor oculos tuos perstrixerit; toties ad maiora atq; illustriora suscipienda, arduam atq; excelsam vim mentis excita & intende. Nunc maiori cõstantia, atq; animi robore, Religio propaganda, libertas Ecclesiæ tuẽda, & Hæresum monstra profliganda: nunc acriori studio atq; industria coercenda audacia, comprimenda iniquitas, frangenda libidines, cupiditatesq; refrænandæ: & qui antea de vnus Poloniæ salute atq; dignitate sollicitus eras, solũm q; ciues tuos pietatis artibus imbuebas,

nunc de vniuerso genere mortalium bene merendi studium suscipiendum est, omniumq; vbiq; locorum, incolumitati, trāquillitati religioni atq; probitati prospiciendum atq; consulendum est. Et cū omnes plagas mundi mentis acie circumspexeris, resq; humanas prouidentia atq; sedulitate administraueris, huc quoq; ad nos oculos tuos humanitatis plenissimos dirige atq; conuerte, hancq; bonorum ingeniorum parentem, optimarum virtutū nutricem, omnisq; doctrinæ liberalis Magistrā amore complectere, liberalitate orna, patrocinio tuere, eamq; in senatu, comitiis, synodis, Regi, proceribus, omnibusq; ordinibus etiam atq; etiam diligentissimè commēdato. Quò pluribus profumus, & commodamus; eò maiori omnium beneuolentia digni sumus: quò minoribus stipendiis tot annos in castris Musarum militauimus; eò vberiora nos manent præmia: quò minus ocii & industriæ ad aucupandos hominum animos habemus; eò alacrius vos magni Patroni vtrò etiam neq; exorati nos ornandos ac tuendos suscipere debetis. Nos verò insignem, & admirabilem hanc tuam in nos beneuolentiam atq; liberalitatem, ad omnem posteritatis memoriam, ingeniis & literis nostris propagabimus, atq; humi strati, altaribusq; aduoluti, omnes Diuos cælestes, publicis priuatisq; precationibus orabimus,

bimus; vt Deus immortalis, qui tuæ dignitatis inceptor & perfector est, consilia tua dirigat, actiones fortunet, valetudinem confirmet, ac crudam viridemq; senectam impertiat, teq; sospitem ac vigentem, lætum atq; felicem, cum sempiterna laude, immortalisq; nominis tui gloria, Ecclesiæ Dei, Reipublicæ Christianæ, literis, omnibusq; bonis, sed & Schoneo, quã diutissimè seruet, foueat atq; tueatur.

*Pagina 7. ver: 15. post verbum
sciendi, addatur causa.*



2

Das
effektiv
Expedi

Quadrat

Das
Broschur
Anzeige
1877
1878

1877

1877

1878

1878

8101

5

